

L Ö G

um

fiskiræktarfélag.

6

14. júní

Vér Christian hinn Tíundi, af guðs náð konungur Íslands og Danmerkur, Vinda og Gauta, hertogi í Slésvík, Holtsetalandi, Stórmæri, Þéttmerski, Láenborg og Aldinborg,

Gjörum kunnugt: Alþingi hefir fallizt á lög þessi og Vér staðfest þau með samþykki Voru:

1. gr.

Heimilt er mönnum þeim, er veiðirétt hafa í sama fiskihverfi, að gera með sér félagsskap um fiskirækt á þann hátt, sem lög þessi mæla fyrir.

Fiskirækt er hverskonar aðgerðir, sem ætla má að skapi eða auki fiskimagn vatna, svo sem klak, innflutningur fiskiseiða, friðun á fiski, eyðing sels og annars veiðivargs.

Fiskihverfi er vatn það eða vötn, straumvötn, stöðuvötn eða hvorttveggja, sem sami fiskistofn byggir og fer um fram og aftur, eða ætla má að fiskur byggji og fari um fram og aftur, þá er ræktaður hefir verið.

2. gr.

Nú vilja menn stofna fiskiræktarfélag við fiskihverfi, sem veiði er í, og skal þá kveðja til fundar eigendur allra þeirra jarða, þar sem veiði er stunduð eða gæti verið stunduð í því fiskihverfi, nema veiðiréttur sé með öllu skilinn frá landareign, og skal þá boða eiganda eða eigendur veiðiréttar. Nú þykir fyrirfram sýnt, að eigandi jarðar muni ekki sækja stofnfund, og skal þá boða leiguliða á fundinn. Má hann taka þátt í umræðum, en ekki í atkvæðagreiðslu fyrir en hann er úrskurðaður félagi í stað landsdrottins, sbr. 6. gr. Ekki er þó skylt að boða þá til fundar, sem veiðirétt eiga í almenningum stöðuvatna samkvæmt 126. gr. vatnalaga, nr. 15 frá 20. júní 1923, en skylt er að gera þeim kost á þátttöku, þá er félag hefir stofnað verið.

Þegar stofna á fiskiræktarfélag við fiskihverfi, sem áður er veiðilaust, skal boða til fundar alla þá, sem lönd eiga að fiskihverfinu.

Nú á félag land að fiskihverfi eða veiðirétt í því, og skal þá boða formann félags.

Til fundar skal boða skriflega og eigi síðar en 3 dögum fyrir fundardag.

6

3. gr.

14. júní Nú hefir verið boðað til fundar samkvæmt 2. gr., og skal á fundinum ræða stofnun félagsins og verkefni og bóka fundargerð.

Á fundinum hafa þeir einir atkvæðisrétt, sem boða skal samkvæmt 2. gr. Fela má öðrum umboð til þess að fara með atkvæðisrétt sinn á fundinum, enda sé umboðið skriflegt og þess getið í fundarbók.

Ef allir þeir, sem kvaddir eru til fundarins samkvæmt 2. gr., samþykkja félagsstofnunina, má stofna félagið þegar, án frekari undirbúnings.

Nú verður félagið ekki stofnað á þessum fundi, og skal þá fundurinn kjósa nefnd, er búi málið undir annan fund. Skal nefndin semja frumvarp til samþykktar fyrir félagið samkvæmt 8. gr., gera áætlun um kostnað þann, sem líklegt er að starfsemi þess hafi í för með sér, leita álits kunnáttumanna um það, sem þurfa þykir, og að öðru leyti afla þeirra gagna, sem fundurinn óskar eftir eða nauðsynleg þykja.

4. gr.

Nú hefir nefndin lokið störfum, og skal hún þá kveðja til fundar á ný samkvæmt 2. gr.

Á fundinum skal nefndin leggja fram öll þau gögn, er hún hefir aflað. Skal þá enn ræða stofnun félagsins og taka ákvörðun um hana. Ef $\frac{2}{3}$ þeirra manna, sem kvaddir eru til fundar samkvæmt 2. gr., eða umboðsmenn þeirra, samþykkja félagsstofnunina, skal öllum hinum skylt að gerast félagar.

Um atkvæðisrétt og atkvæðagreiðslu fer eftir 3. gr. laga þessara.

5. gr.

Nú mæta ekki á fundi $\frac{2}{3}$ þeirra manna, sem boðaðir eru, né umboðsmenn þeirra. Skal þá undirbúningsnefnd enn boða til fundar á hæfilegum fresti. Ef $\frac{2}{3}$ þeirra manna, sem mæta á þeim fundi eða senda þangað umboðsmenn, samþykkja stofnun félagsins, skal öllum öðrum, sem boðaðir hafa verið samkvæmt 2. gr., skylt að gerast félagar.

6. gr.

Stofnfundur eða annar lögmætur félagsfundur getur úrskurðað, að leiguliði skuli gerast félagi í stað landsdrottins, 1) ef leiguliði óskar þess og landsdrottinn samþykkir, 2) ef fyrirsjáanlegt er, að landsdrottinn geti ekki tekið þátt í félagsskapnum né notið starfsemi hans og 3) ef jörð, sem land á að fiskisvæði félagsins, er í byggingu með þeim kjörum, að landsdrottinn telur sér ekki skylt að taka þátt í félagsskapnum. Þá skal þó jafnan boða leiguliða á fundinn. Afl atkvæða ræður úrskurði, en ekki skulu málsaðiljar eiga atkvæði um úrskurðinn.

Skylt er landsdrottinni, þá er leiguliði fer frá jörð, að greiða hon- **6**
um eftir mati þá veiðiaukningu, sem þá er orðin á jörðinni og þakka má ^{14. júní}
starfsemi félagsins, enda hafi leiguliði greitt gjald það, sem jafnað er
niður samkv. 9. gr.

Skal landsdrottinn greiða 10-falda þá upphæð, sem úttektar-
menn meta, að árlegt afgangur jarðarinnar megi hækka fyrir aukna veiði.

7. gr.

Heimilt er að taka í félag aðra menn en þá, sem taldir eru í 2. og
6. gr., ef lögmætur félagsfundur samþykkir, en ekki skulu þeir hafa at-
kvæðisrétt í félaginu, nema þeim séu ákveðin iðgjöld í gjaldskrá félagsins

8. gr.

Nú er stofnun félags löglega ákveðin, og skal þá gera samþykkt
fyrir félagið þegar á stofnfundi eða öðrum fundi boðuðum á sama hátt.
Um samþykktina ræður afl atkvæða.

Í samþykkt félags skulu vera ákvæði um:

1. Nafn félags, heimilisfang og varnarþing.
2. Verkefni félags og félagssvæði.
3. Skipun og starfssvið félagsstjórnar.
4. Fundarhöld.
5. Reikninga félags og endurskoðun.
6. Hvernig fara skuli um greiðslur kostnaðar þess, sem leiðir af starf-
semi félagsins.
7. Sektir fyrir brot á samþykkt félags.
8. Hvernig samþykkt félags verði breytt.
9. Hvernig fara skuli um félagsslit.

9. gr.

Kostnaði þeim, sem starfsemi félagsins hefir í för með sér, skal
jafna niður eftir áætluðu veiðimagni jarða þeirra, sem taka þátt í fé-
lagsskapnum. Samkvæmt þeirri meginreglu skal semja skrá, er sýni
hundraðshluta þann af kostnaði (stofnkostnaði og árskostnaði), sem
hver félagsmaður á að greiða. Skrá þessa skal semja með hliðsjón af
veiðiskýrslum undanfarinna ára, ef til eru, en annars eftir áætlun, og
skal hún gilda um 5 ár, nema $\frac{2}{3}$ félagsmanna samþykki að breyta henni
eða ráðherra skipi svo fyrir.

Gjaldskrá skal lögmætur félagsfundur samþykkja. Um hana
ræður afl atkvæða.

6

14. júní

10. gr.

Samþykkt, ásamt kostnaðaráætlun og gjaldskrá, skal félagsstjórnin senda ráðherra til staðfestingar. — Ef samþykkt og gjaldskrá þykja þannig úr garði gerðar, að þær verði ekki staðfestar, sendir ráðherra þær aftur til félagsstjórnarinnar með athugasemdum um það, er ábótavant þykir. Ella staðfestir hann samþykkt og gjaldskrá, svo og er það hefir lagað verið, sem ábótavant þótti.

Aldrei má samþykkt brjóta í bág við gildandi lög né almennar grundvallarreglur laga. Með samþykkt verður eigi breytt sérákvæðum laga um friðun á laxi, nr. 5, 19. febr. 1886, og annara laxveiðilaga, er sett kunna að verða.

11. gr.

Nú verða eigendaskifti á jörð, sem er á félagssvæði, og er þá hinum nýja eiganda skylt að gerast félagi. Þegar ábúendaskifti verða á jörð, þar sem leiguliði er félagismaður í stað landsdrottins, getur lög-mætur félagsfundur úrskurðað, að hinn nýi ábúandi gerist félagi samkvæmt 6. gr.

Nú er veiði hafin fyrir landi jarðar, sem liggur að fiskihverfi, er fiskiræktarfélag starfar við, en utan félagssvæðis, og er þá eiganda hennar eða ábúanda (sbr. 6. gr.) skylt að gerast félagi.

12. gr.

Nú þykir æskilegt, að félag nái til fleiri en eins fiskihverfis og er það heimilt, ef $\frac{2}{3}$ af eigendum þeirra jarða, þar sem veiði er stunduð í hverju fiskihverfi fyrir sig, samþykkja félagsstofnunina. Að öðru leyti fer um stofnun félagsins eins og sagt er í lögum þessum.

Nú þykir æskilegt, að tvö félög eða fleiri sameinist í eitt, og er það heimilt, ef $\frac{2}{3}$ félagsmanna í hverju félagi samþykkja, enda mæli vatnalíffræðingur með því. Skal þá stofna eitt félag, er nái yfir svæði beggja félaganna eða allra, og fer um stofnun þess eins og lög þessi mæla fyrir.

13. gr.

Gjöld félagsmanna, sem ákveðin eru samkvæmt staðfestri gjaldskrá, má taka lögtaki.

14. gr.

Í samþykkt félags má ákveða, að brot á samþykkt varði allt að 200 króna sekt, er renni í félagssjóð.

Mál út af brotum á lögum þessum eða samþykkt félags skulu sæta sömu meðferð og almenn lögreglumál.

15. gr.
Lög þessi öðlast þegar gildi.

6
14. júní

Eftir þessu eiga allir hlutaðeigendur sér að hegða.

Gjört á Sorgenfrihöll, 14. júní 1929.

Undir Vor konunglega hönd og innsigli.

Christian R.
(L. S.)

Tryggvi Þórhallsson.

L Ö G

um

tannlækningar.

7
14. júní

Vér Christian hinn Tíundi, af guðs náð konungur Íslands og Danmerkur, Vinda og Gauta, hertogi í Slésvík, Holtsetalandi, Stórmæri, Þéttmerski, Láenborg og Aldinborg,

Gjörum kunnugt: Alþingi hefir fallizt á lög þessi og Vér staðfest þau með samþykki Voru:

A. Skilyrði fyrir tannlækningaleyfi.

1. gr.

Rétt til að fara með sjálfstæðar tannlækningar hér á landi hefir aðeins sá, er fullnægir eftirfarandi skilyrðum:

1. Hefir lokið tannlækningaprófi í tannlæknaskóla, er viðurkendur er af heilbrigðisstjórn ríkisins.
2. Talar og skilur fullkomlega íslenska tungu.
3. Hefir að afloknu prófi (ef námstími skólans er aðeins 3 ár) verið að minnsta kosti eitt ár aðstoðarmaður við lækningar hjá viðurkendum tannlækni hér á landi, eða á annan hátt aflað sér álíka þekkingar og reynzlu í tannlækningum, að álitu heilbrigðisstjórnar.
4. Hefir óflekkað mannorð.